



Fepuari 2023

TOMANATUGA FA'ALEAGAGA MASINA FEPUARI 2023

Tusi Faitau : Sapakuka 2:3 (MATUA : “AUĀ OLE FA’AALIGA UA TUUINA MAI; E O’O MAI LAVA.

MATUA : “ O OE MA LAU VISIONA .”

Ile suafa mamalu o Iesu Keriso le Ao ole Ekalesia, ou te toe ofo alofa ma faatalofa atu ai fo’i ile Paia ma le Maualuga ole tatou Kapelenisia Samoa, i totonu ole Pule’aga Faaakiepipoko i totonu o le Laumua i Ueligitone. Manuia lava lenei tausaga fou, ole viiga sili lea i lo tatou Tapaau ile Lagi.

Ae alo maia, o se TOMANATUGA FA’ALEAGAGA fo’i lenei mo i tatou le Nu’u ole Atua, aemaise le tatou au Faitau o lenei Auaunaga masani a le tatou Matagaluega (Kapelenisia) Katoliko Samoa i masina taitasi, le TAULOGOLOGO.

O lo’o faapea mai le tatou MATUA: “ O OE, MA LAU VISIONA”. Ole visiona, ua fa’aliliuina i ai le upu fa’apalagi ole “Vision” e tutusa ma le ‘fa’aliga’. E fa’asino ile va’avaai mamao, silasila mamao po’o le silasila loloto, mafaufau mamao/loloto, manatunatu mamao/loloto, po’o le tofa mamao/loloto. O lona uiga o se MAFUFAUGA e fa’amatalaina ai le malosi fa’alefa’atuatua e iloa ai fa’aaliga i mea a tutupu ile lumanai; e ta’u fo’i e isi o miti, po’o ni fuafuaga tu’utu’u mamao i mea e fa’ananau i ai le loto e manuia ai. O se mea taua tele i so’o se tagata poto, ma mafaufau lelei, tagata e sogasoga ma sa’ili’ili i mea taua ole ola, ma o se tagata fo’i e na te fia mauaina manuia ole Atua, ma ua malie ole a ia faapea fo’i ona ia toe faasoaina atu ia lava manuia mo isi tagata.

1. Ole mea moni lava, so’o se tagata e sa’ili’ili ma mulimuli ia Iesu, e tatau lava ona i ai sana visiona (vision) Fai mai le ta’iala a le Vaega Fa’aupufai o lo’o tu nei ile Foe ole Malo Tuto’atasi o Samoa le FAST PARTY..”FOLAU MA LE FA’ATUATUA “ (SAILING WITH FAITH) “A leai se visiona, e puapuagatia tagata.” (Where there is no vision, the people perish.) Ole visiona, na te avatu ia te oe ma aumai ia te a’u le fa’asinoala.(directions) ole fa’aosofiaga, (motivation) ole taulagalaga amatamea,(creativity) ma le malosi’aga,(resilience). A leai se visiona, ole a avea oe ma tagata e leai e leai sona faamoemoe aga’i i luma. E leai se to’aga e galue ma sa’ili’ili ma ole a faigofie fo’i ona lamatia oe ile malie gofie i mea faigofie ma taugofie ua i ai ile taimi nei.
2. So’o se visiona, e i ai faatasi avanoa matala ma mea fa’afatiatama’i . Sa i ai se tasi o alii Amerika na malaga i Peretania e fa’amaopopo mea totino ma fanua o lona aiga, ma o lona ia lea tofi mai ona matua. E taunuu atu le alii ua na o sina fale malepe e tu’u ai meaai a manu ma le fanua gaoā e tele i papa. Na tonu isi ona loto, ole a sili ia ona toe fo’i i Amerika, ae o lana toe savaliga mulimuli e faamavae ai i lona fanua, na ia vaaia ai se vaitafe o tafetafe lemū mai i lalo o papa ile tulimanu ole fanua. Na ia su’esu’e ma iloaina ai o nei vaitafe, o ni vai vevela, ma amata ai loa ona fai le atina’e ua o’o mai lava i aso nei, ma ua avea ma se tasi o mata’aga i totonu o Egelani. Pe afai tatou te fa’atoga moni, ma le loto i ai ile Atua mo se visiona, e le taumate o le a tu’u oe ma a’u e le Atua i se laufanua o lo’o i ai manuia o lo’o natia i lalo o fa’afitauli, o se fanua o lo’o matala ai avanoa e tele, i lalo ifo o mea gaoa ma le tele o fa’afatiatama’i. Ona ia fa’atali lea ma silasila mai, pe fa’apefea ona o tatou tagofia mea ua ia tu’uina mai i ou ‘a’ao ma o’u lima.
3. E lē mafai e ni mea fa’afatiatama’i ona fa’aleaogaina au fuafuaga e aunoa ma lau maliega. E manatuaina pea le Ali’i Palemia ta’utaua o Peretania tele o Winston Churchill i ana lauga i taimi ua tulata fa’ai’ui’u ma lona to’lilalo ile taua lona lua ole lalolagi. O ana lauga e matua ile “aua” “aua” “aua lava le si’ilima.” O fa’afatiatama’i, au o ni mea e le ma’alofia, ae ole si’ilima ole mea e te filifili i ai. Afai e malosi lou FA’ATUATUA ma e te musu e te to’lilalo, e faigofie lava ile Atua ona faataunuu lau visiona ma fuafuaga.

TOMANATUGA FA'ALEAGAGA MASINA FEPUARI 2023

- i) E ui ina sa mamafa avega o lo latou nofo pologa, ae na maua e Israelu le malosi sa faigata ai ona gauia e Aikupito. *“Ua latou fa'atiga ia i latou, ua atili ai ona fa'ato'ateleina, ua atili ai fo'i ona tutupu.”*(Esoto 1:12)
- ii) Ole visiona a le Aposetolo o Paulo 'ina ia fa'atalaleleina le lalolagi, sa fetai'ia ma le tele o mea faigata e fa'avaivaia ai, ae le'i mate ai lona faamoemoe. *“Ua puapuagatia i matou i mea uma, ae le fa'aatuatuvaleina; ua fememea'i, ae le matua fememea'i; ua sauaina, ae le tu'ulafoa'ina; ua lafoina i lalo, ae le mafai ona fano.”* ... (2Kori 4:8-9)
- iii) O le auala na ui ai Iosefa mai le aso o lana miti seia nofo ile nofoali'i o Aikupito o se ala umi, sa i ai le fa'alataina, sa i ai le agaleagaina, sa tu'ua'ina pepelo o ia atoa ma le tele o isi fa'afatiatama'i. Ae peita'i sa ola pea lava lana miti ma sa matua'i manino pea lava i lona mafaufau lana visiona o lona manumalo lea. Fai mai a ia, *“Ua fa'auluolaina a'u e le Atua ile Nu'u na puapuagatia ai a'u.”* ..Na sa'ilii'ili e Iosefa avanoa i totonu o mea fa'afatiatama'i, ona fa'amanuia lea ole Atua ia te ia; e le'i ave'esea e le Atua mai ia te ia puapuaga, ae sa si'itia ai lava o ia e le Atua i totonu “ole Nu'u na puapuagatia ai”.

4. Ole va o au miti ma lona fa'ataunu'uina, ole a matua'i tofotofoina ai oe e pei o Iosefa i mea nei:

- i) Tofotofoina ole Faatuatua. Ole mea sa faigata ia Iosefa ole toatasi na o ia ma lona fa'atuatua i lona Atua, i se si'osi'omaga o tagata 'ese ma fa'apaupau. E leai se isi na lagolago ma fa'amalosi ia te ia. E faapena fo'i ona tofotofoina oe ina ia aua le taunu'u au miti ma lau visiona, ae ia e fa'atuatua pea.
- ii) Tofotofoina ole onosa'i. E le'i vave taunu'u miti a Iosefa-na fai a'o talavou, ona fa'atali lea seia o'o ina matua pe toe'ina; e le faigofie le fa'atali po'o afea- uma atu lea tausaga ma lea tausaga e le tino mai lava se mea. Ole *Onosa'i e le na ole fa'amoemoe ia taunu'u miti, ae ole talia o tiga ma talitonu ile Atua na fetalai, “Auā ua aoga ia te outou le onosa'i, 'ina ia maua e outou le mea na folafolaina, pe a uma ona faia e outou le finagalo ole Atua .”*
- iii) Tofotofoina ole malosi. E uma le malosi ile tele o tagata ma fili e o lo'o taumafai e titina i lalo nai ou mo'omo'oga, e ao ai pea ona e fa'amalosi 'ina ia e sa'ilii pea ile puna ole malosi sili.
- iv) Tofotofoina ole tulimata'iga. E matuai matafelefele le tele o mea fa'afelavei e ave'ese ai lou mafaufau ma lou loto mai mea lelei o lo'o tulimata'i, ae “ao ina tatou tu'u 'ese mea e mamafa uma, atoa ma le agasala e fa'alavelavegofie ai i tatou...ma ia va'ava'ai atu ia Iesu..(Eperu 12:1-2)
- v) Tofotofoina ole ola mata'ala ma sauniuni..E avea le tuai ona taunu'u o a tatou miti ma isi faafitauli e tele, e tauaso ai le va'ai i avanoa ma faitoto'a e tatalaina mai e le Atua, e ao ina tatou malosi ile tatalo e ala ai mata.

2

5. *E i ai le tala masani ile atalii ma lana tupua na fai ile toea'ina, po'o ola po'o ua mate le manulele sa i totonu o ona lima. Na mate'ia e le toe'ina le tupua. “Ole tali o lo'o i ou lava aao, ma o lo'o i o'u fo'i lima..”* E fa'apena le tali o au miti ma le fa'ataunu'uina o lau ma la'u fo'i visiona- o lo'o i ou lava lima. E matua'i le mafai lava e le fili ona sosofa pe talepeina o tatou fa'amoemoega, ae mafai e la tatou amio. Fai mai Sagato Paulo. *“Ia outou olioli ile Ali'i e le aunoa, ou te toe fai atu; ia outou olioli. “* O lona uiga aua fo'i tatou te vave fiu gofie ne'i o tatou fa'anoanoa; e leai se mea e vave ona uma se'i loga e fai mai le Atua ua uma. I le ma lenei le au pele, e pulea lava e le Atua mea uma, e le mafai ona tatou pulea; ae mafai ona tatou pulea a tatou amio pe a o'o ina tutupu mai mea leaga.

Le tatou Kapelenisia Samoa, le tatou au faitau, Aiga ma uo. O lea fo'i ole a tu'u i le tai lo tatou Sa folau mo lenei fo'i tausaga fou 2023. Pe sa o tatou moe manatunatu mo se VISIONA e folau ai lo tatou Sa i lenei tausaga? Ole a se moemitiga mo lou Aiga, lau Aulotu, le tatou Kapelenisia Katoliko Samoa mo lenei 2023?

loe!! Talosiaina o se visiona ina ia tatou taupati faatasi, ae le ole taumafai e tu to'atasi. Manatuaina upu masani, “e leai se tasi e tu fa'amauga.” Auā fo'i tatou te le soifua FA'AVAVAU. E le tumau so tatou malosi, e le tumau le atamai ma le iloa, e fa'asolo lava ma mou atu. A'o le tutū faatasi, tausoa faatasi, ma tautosoa faatasi, e maua ai le malosi sili, ma ole tu'u faatasi o nai vaivaiga se tele e mafai ona faatupuina ai se malosi'aga tele. Ole manuia ole Kapelenisia Samoa i Ueligitone i lenei Tausaga fou, e fa'amoemoe ile tatou sapaapapai o nai a tatou Faiaoga Aso Sa ma fanau A'oga Aso Sa i totonu o a tatou Aulotu, lagolago i nai a tatou Tupulaga Talavou i polokalame o'i latou o ta'ita'i mo le Ekalesia i aso nei. Lagolagosua i Mafutaga a Tina, Ituaiga Sagata Ana, le Utuaiga Tolu, le Autau a Maria aemaise le Mafutaga Tatalo a Iesu le Aagalofa Mamana. O nei Mafutaga uma, o lo'o tatou faatupuina ai pea le tino o Keriso ma lana Ekalesia.

Ua i ai sau visiona? Aua e te si'ilima gofie ona mautinoa lea e taunu'u!!

E leai sau visiona? Fesili nei ile Atua e aumai se mea ma oe!!

A o’o ina taunu’u? Toe valaau ile Atua mo se isi mea fou!!!

Ole luitau, ua fou le Tausaga, sa’ili’ili ni mea fou, mafaufauga fou, moemitiga fou, taumafa fou e ola ma soifua lelei ai le tino, ae silisili taumafa faaleagaga e malosi ai sootaga ma le mafutaga lilo ma le Atua. Ioe, le au pele, tatou u’u lima faatasi, savavali ma taufetuli faatasi, ma le loto fatasitasi ile fa’amoemoe e tasi, “E MANUIA AI OE MA LAU VISIONA”.

MANUIA TELE LE FAIGAMALAGA FA’ALEAGAGA O LENEI FO’I MASINA O FEPUALI..

SOIFUA ONA O KERISO

Vauei & Veronik Tolova’a (FKS)

FA’AFEILOA’I

O le ā ou le toe toloa umuloa pe toe lotoia le lauti fatulalo i pa’ia sausaugata o le tatou Kapelenisia ole í’a iviivia. Ae tau ia ina ou taia le tafa’itoa ma ou fa’apoipoi fa’ala’au tuvanu, se’i aganoa lo’u leo ae ou alagaina le galu e faigata le pa’ia maualuga ole tatou Kapelenisia i ona tulaga fa’alupea.

E matou te fa’atalofa ma feiloa’i atu ai lau Afioga Katinale John Dew o le Tamā o le Pule’aga Fa’a- Akiepipokō Uelegitone, fa’apea le Itu’aiga Sa.

Fa’atalofa atu fo’i ile Afaigaluega Pa’ia a le Atua ma Faletua o lo’o fa’afale le malu i Fata Faitaulaga e fia i tot-onu o le tatou Kapelenisia Samoa i Uelegitone.

E ofo alofa ma fa’atalofa atu fo’i i lau Afioga Salā Mika Teofilo, o le Ta’ita’i o Polokalame a le Kapelenisia Samoa.

Ae o se fa’atalofa ma se fa’afeiloa’i atu fo’i i Afioga i Peresitene & Ofisa uma, aemaise le pa’ia i Tupu ma Tamali’i, Tapa’au ma Aiga, Fale’upolu o Tofiga aemaise le laveloa o le Kapelenisia i ona tulaga aoao tetele.

3

Malo le soifua manuia, fa’amalo le lagi matafi.

Fa’afetai ile alofa ma le agalelei o le Atua Foafua, ua mafai ai ona tatou aulia mai lenei masina ae o lo’o fatisina pea le galu i lo outou soifua galulue, aua le Atua ma lana galuega, ae fa’apea fo’i le tausiga o Aiga. Malo le fai o le faiva, ua fa’amalo le onosa’i.

O lea ua tatou aga atu fo’i i lenei tausaga ma ana polokalame ua uma ona fa’ata’atitia. O le tatalo ile Atua ina ia fa’apena ona fa’atumauiina pea le soifua maloloina ile tino, agaga ma le mafaufau ile Afioga le Katinale aemaise o le Itu’aiga Sa, aua le fa’aauuina o lo latou Vala’auina.

Ia agalelei fo’i le Atua ile pa’ia ile Afaigaluega a le Atua & Faletua aemaise le tatou Kapelenisia i ona tulaga fa’alupea, aua le feagai ai ma tiute ma faiva alofilima ua tofia iai.

Maua se malosi o le Afioga ia Sala Mika aemaise o le Komiti Fa’afaoe aua le fa’aauuina o le matou fo’i pitola’au.

Ma lo’u fa’aaloalo lava,

Fa’afetai



PĀULI SOLA NEI PERESITENE

KAPELENISIA SAMOA UELEGITONE

FAUTUAGA FA'AEVAGELIA: MATIVA

Na fa'avaeina e Pope Faranisisi se Tausaga fa'apitoo mo le Olaga Fa'apa'iaina mai le Atevetu 2014 aga'i atu i le Sulufaga o le Momoliga i le aso 2 Fepuari 2016. I lana tusi na fa'avaeina ai lenei tausaga fa'apitoo sa ia aumaia ai ni sini se tolu: ia tepa i le tuana'i ma le fa'afetai, o se vala'au ia ola ai i le taimi nei ma le tu'inanau, ma fa'amaopo mai le lumana'i ma le fa'amoemoe.

I lenei va'aiga i se mataupu talafeagai i tusitusiga a le Vatikano II i le ekalesia, Lumen Gentium, i le mataupu lima: 'Le Vala'au mo le Pa'iaga'. O lea ua aumai le vala'au lautele i le au fa'atuatua ina ia fa'apa'iaina, faia le fa'amalosi'au mai le folafolaga a Sagato Paulo: O le finagalo fo'i lenei o le Atua, ia fa'apa'iaina outou (1 Tesalonia 4: 3). O lenei pa'iaga a le Ekalesia o lo'o fa'aalia so'o mai i fua o kalasia ua faia e le Agaga i le au fa'atuatua ma ia tatau ai ona; fa'aalia i ni auala se tele e tagata ta'ito'atasi, i lona ia lava tulaga fa'aleolaga, aga'i atu i le lelei atoatoa o le alofa, ma fa'apa'iaina ai isi; ua foliga mai ai i se auala patino ia lava i le fa'atinoina o galuega faufautua sa masani ona ta'ua "fa'aevageliaina" (LG.39). O nei faufautua fa'aevagelia e masani, i le tu masani Kerisiano, ua fa'ailoaina o le mativa, legavia ma le uista'i. I le tomanatu ai i le mativa o le au faufautua ia malamalamaina i le leai o ni 'oa, ae i se fa'afitia ua faia ma le loto i ai e lu'itau ai pe fa'aapefa i mea totino ona fa'alavelave i le fa'asoa tutusa.

I fa'apotopotoga fa'alelotu, o le tautoga i le nofo mativa o le te'ea lea o le umia o 'oa fa'aletino mo le tagata lava ia, ma le umia fa'atasi o 'oa mo le lelei atoatoa o tagata uma. E ao i lena va'aiga o se molimau vi'ia, e tatau ona malamalamaina i le tulaga o se fa'ata'ita'iga i le olaga o Keriso. O le mativa fa'aevagelia o se filifiliga ua faia ma le loto i ai ina ia ulufale atu i se fa'atasiga ma le au matitiva ina ia mulimuli i fa'ata'ita'iga a Iesu o le sasa'a atu: "Auā ua outou iloa le alofa tunoa o lo tatou Ali'i o Iesu Keriso, sa tamaoiga ia, a ua fa'amativaina ona o outou, ina ia fa'atamaoigaina outou i lona mativa" (2 Korinito 8: 9) ma na toe fai mai "a ua sasa'a atu o ia e ia lava, o fai mona le uiga o le pologa, i lona fanau mai fa'apei o tagata" (Filipi 2: 7). I le malamalamaina i lenei va'aiga o le mativa e lē o va'aia o se mea e leaga ae o se uiga e lelei. E lelei ona e tulimata'i i le mulimuli latalata ia Iesu, fa'aoga ana filifiliga ma fa'ailoa fa'atasi ma ia i lona fa'ailoaina fa'atasi ma le

au matitiva, e pei o le fa'ata'oto maoa'e o mamoe ma 'oti: "E moni, ou te fai atu ia te outou, auā na faia e outou i le tasi o e aupito ititi o o'u uso nei, o a'u lea na outou faia i ai" (Mataio 25: 40). O lona fa'aupuga a Iesu e lē agava'a, ma e pei o mana'oga e ao ona va'ai i ai ma le toto'a – o le filifiliga a lē ola ai e ala i le fautuaga fa'aevagelia o se molimau malosi i le maoa'e o lena vala'au.

O le filifiliga mo le mativa a nisi o se filifiliga o le fa'atasiga ma le au matitiva, ma o se lu'itau i le Ekalesia laua'itele mo se mea ua ta'ua 'o se fa'amuumua mo le au matitiva'. O le molimau ma le loto i ai a le au fai tofi ua fa'amatala ai se vala'au e lē na o se toaititi ae o se mana'omiaina mo latou uma e mulimuli ia Keriso.

Talu mai le amataga o le nofoa'iga a Pope Faranisisi sa tu'uina so'o atu lona leo mo latou ua puapuga i le mativa: O nisi o a tatou matāfaioi o ni molimau i le alofa a Keriso, o le avatu o o se lē ōi i le tagi a le mativa. 'Mativa' ua fai mai ai, 'ua vala'auina i tatou e totō le fa'amoemoe...Mativa o le 'a'ano a le Iesu mativa, i lenā tamaititi sa fia 'ai, i lē ua ma'i, i nā fa'atutaga fa'asosaiete lē amio tonu. E le gata i lea, mativa ua ia fai mai ai e lē taliaina i le lalolagi i nei onapō: ua fa'ailoa i le tele o taimi e nusipepa le tele o le mativa i le lalolagi ma o se fa'aleaga. I se lalolagi o lo'o anoanoa'i ai le 'oa, le tele o puna'oa e fafaga ai tagata uma, e lē fa'amatalaina le anoanoa'i o tamaiti fia 'a'ai, le anoanoa'i o tamaiti e lē ā'o'oga, le anoanoa'i o tagata matitiva. Mativa i aso nei o se tagi.

O le vala'au a Pope Faranisisi e va'ai atu i le au matitiva o le vala'au a le evagelia; i le lalolagi o aso nei o le feso'ota'iga ua manino lelei mai ai ona o le moni o le mativa fa'atasi ai ma le anoanoa'i o le 'oa ma le tu lelei ua iloa lelei lava. O se vala'au fo'i ua lē na ona fa'aleo mai ae ua faia ma liu tino tagata e filifiliga a fafine ma ali'i e fa'ailoa fa'atasi ma le fe'au a Iesu ma latou uso ma tuafafine e ala i le filifiliga e ola ai i le mativa i se lalolagi maumea.

ASO SA MUAMUA O LE FAGAFULU (ASO 26 FEPUARI)

O le amataina o le Fagafulu i le tala o le pā'ū'ū o tatou ulua'i matua o ē na lē usita'ia le upu a le Atua i le 'aia o le fua fa'asaina, e ao fo'i iā i tatou ona maitauina o tatou tulaga agasala. Ae le'i aga'i atu Atamu i le auala ole lē usita'i, o lenei ali'i ma le fafine sa iloaina lelei le fiafia, ma le ola ai i le lelei ma le Atua. I le tulaga o le mā'ale'ale na fa'ailoa ai e le gata o ia i le fa'aosoosoina o Atamu ma Eva ina ia faia i la'ua ia tutusa ma le Atua. O le taunu'uga o la gaioiga ua lafoia ai se fa'apaologa umi i luga o tagata talu mai lea taimi ma fausia ai se pā o le fe'ese'esea'iga ile va o le Atua ma i tatou. O le lā pa'ū'ū i le agasala na ave'esea ai le aiā tatau a le tagata ma avatu i ai le avega mamafa o le agasala tu'u fa'asolo. Ua aumai ai le ituaiga o lalolagi ua tatou malamalama lelei i ai – o se lalolagi ua mālepelepe ona o le agasala – ma e lē tau sa'ililia fo'i ni molimau o a tatou fo'i nofo agasala. O lo'o i ai le agasala i o tatou olaga ma e tumau ai pea se'ia o'o i le gata'ana o tatou aso. O le a tatou lē fa'amaoni iā i tatou lava pe afai tatou te lē fa'ailoaina lenei. Ae ui i lea, e lē o le iloa atu o mea uma ona mai le toafa ua sau ai lesu e amata lana tala'iga o le lavea'ina o le tagata.

O le mea ua sili atu i lo mea na lē toe mauaina mai ona o le lē usita'i o Atamu o le ola fou na manumaloina ona o le usita'i a Keriso o lē sa fa'asoa i o tatou vaivaiga ina ia tatou ola ai i lona malosi'aga. O le feoa'i lē tapasaina i tausaga ua mavae ua maua ai se fa'asino ala manino iā lesu Keriso o le malamalama ua susulu i le pogisa ma fa'ailoa ai le agasala ma lona leaga. O le tala ole fa'aosoo-soga o lesu, sa fa'aosoosoina e fa'aoga sesē lona mana

mai le Atua mo ni faiga fa'apito mo ia lava ua lauiloa lelei. Ina ua vaivai ma fia 'ai o ia sa faigofie ona liliu ma'a ma falaoa ma ave'eseina ai le fia 'ai. Fa'apea fo'i le oso 'ese mai le tumutumu o le malumalu o se va'aiga matagofie le fa'ailoaina o lona latalata i le Atua. O le ifo ma 'au'au atu i lē na fa'aosoosoina o ia o le a fausia ai se papuipui o le lē usita'i i le va ole Tamā ma ia. I le tu'uina atu o ia lava ina ia tofo i le fa'aosoo-soga ua ia faia se fa'ata'ita'iga e tatau iā i tatou uma ona mulimulita'i pe a tatou feagai atu ma tofo-tofoga fa'aletagata o le filifili i le va o le lelei ma le leaga. Tatou te maua mai le mafanafana o le Fa'aola na silafiaina le tulaga o le fa'aosoosoina ma o le i'uga e mafai ona alofa mutimutivale iā i tatou ona o tatou vaivaiga.

O le Fagafulu o se taimi mo se olaga fou iā Keriso. I le 'au atu fa'atasi ma lesu i le toafa o tatou loto ua tatou avatu la tatou mata'itu i mea e ta'ua i lenei olaga. O le leo o le Atua o lo'o vala'auina i tatou i le aiga moni ma e tatau iā i tatou ona faia ni fa'ai'uga mautinoa e 'au'auna atu ai i le Ali'i ma faia mea e fa'afiafiaina ai o ia. E lē o se vaitau lenei e fa'agalo ai nisi o mea masani ae o se avanoa e toe fo'i ai i mea a le Atua ua tatou tu'ulafoa'ina. O amioga lelei e faigatā ona tausi pea ae faigofie ona leiloa atu. Tatalo, anapogi ma le limafoa'i o tulaga ia o le vaitau. I le taimi lava fo'i lenei ia tatou 'alo 'ese mai i gaioiga mamafa o le fa'anoanoa ma le māasiasi. A tatou faia ni mea fa'atigā i tua atu o tatou mafai, atonu o le a avea i tatou ma togisala a isi. Manuia le faimalaga a le Fagafulu o lenei tausaga.

POPE PENETITO XVI (1927 – 2022)



“O le olaga atoa e aga'i atu i se feiloa'iga”

O se tasi ua tu'ua lenei lalolagi ma o le a i ai i luma o le Atua, ma luma o tagata pa'ia, ma luma o uō ma latou e lē o ni fa'auō.

I taimi ta'itasi ou te manatu ai o le a muta. Ou te taumafai e tatala atu o a'u lava mo lenei, ma i lona fa'atumutumuga lava, ia tumau o a'u nei le taimi nei. O le mea ta'ua lava e le ona na ou manatu i ai, ae ua ou ola i le manatu i ai, ma o le olaga atoa lava e aga'i atu i le feiloa'iga. Penetito XVI.

Mai lona talavou fiafia i se aiga maopopo i le alofa aga'i atu i lana fa'amavaega mai le tofiga Pope, o Iosefo Ratzinger na tu'uina atu lona soifuaga atoa i le 'au'aunaga i le Ekalesia ma le moni. O lenei ali'i agamaualalo e tasi lona

fa'anaunauga: ia fa'aosofiaina se alofa tele mutimutivale mo lesu. O le 265 ai lea o Pope a le Ekalesia Katoliko.

Penetito XVI: Lona Soifuaga, Ona Mafauauga, o Āna Tatalo

O se ali'i matagofie ma le agamalū, e alofa naunau i le fa'amaoni.

O lona soifuaga: o se ali'i o tatalo, o se faife'au agamalū ma le anoanoa'i o mafutaga lelei ma isi, o se fai telosia mata'ina a le Ekalesia Katoliko, o se molimau i suiga uma a le Ekalesia talu mai le Taua Lona Lua a le Lalolagi.

O ona mafauauga: o a'oa'oga, e fa'atauvā'a ma mā'ale'ale, a se fai telosia ma se faia'oga e loloto le malamalama'aga i le misitelio Kerisiano.

O ana tatalo: o ni filifiliga o fa'amatalaga i Salamo, tomanatuga ma tatalo, ua fa'ailoaina mai ai le loloto a lona itū fa'aleagaga.

O le tala i le lisi o maletile a Roma e le tasi ae lua ni Val-etines, mo le aso 14 Fepuari. O lē muamua e faitau fa’apea: “i le aso 14 Fepuari, i le ala o Via Flaminia i Roma, Sagato Valentine, ositaulaga ma le maletile, i le mae’a ona faia o ni vavega o le fa’amalologa, ma na lauiloa i lana aganu’u, na fasiotia i le tipi ‘eseina o lona ulu i le pule a Kaisala Claudius’. O le lona lua ua fa’apea mai: i le aso 14 Fepuari, i le pito nu’u o Terni, i le uma ona sasaina tigaina, o Sagato Valentine na fa’afalepui-pui ma talu mai lena taimi sa le mafai e i latou sa fa’afalepui-puia o ia ona saisaia o ia ma na fa’alilolilo ona toso o ia i fafo atu ma le falepui-pui i le leva o le po ma ave’ese lona ulu i le fa’atonuga a le au Placidus, ta’ita’i Roma”.

O le Ositaulaga Roma

O le tala ia Valentine, le ositaulaga Roma, e alu i tua i le vai-tau AD270, i taimi o le fa’asauaga a le Tupu Roma o Claudius Gothicus. Sa lauiloa Valentine i lona pa’iaga ma o le Tupu, sa maofa i lona ta’uta’ua na vala’auina o ia i le maota o le tupu. Sa ia ofoina atu ia Valetntine lana fa’auō ma fai atu e tatau ona ia tapua’i atu i atua. Ae na fai mai Valentine i le loto tele ma le maumaututū o le ma’imau o le taimi e tapua’i ai ina atua ona na aumai e Iesu Keriso le fa’amoemoe moni e tasi ma le folafolaga mo se lalolagi e sili atu. Na maofa le Tupu i le fa’atuatua a Valentine ma na tu’uina atu ma le fa’atuatua o ia i se ali’i Roma e igoa ia Asterius, ma fa’atonu atu i ai e fa’aliliu Valentine i le fa’aogaina o “finauga e mālie”. Sa i ai se afafine a Asterius na tauaso talu mai le lua o ona tausaga. Sa tatalo Valentine i ona luga ma na toe pupula le teneitiiti. I le feagai atu i lea vavega, na liliu Asterius i le Fa’akerisiano fa’atasi ma lona aiga atoa. Ina ua fa’alogo le Tupu i lenei liliuga, na tu’ua’ia e le Tupu o Claudius Valentine ma poloa’ia e tipi ‘ese lona ulu. Na fa’ataunu’uina lenei fa’asalaga i le auala e aga’i atu i le sami mai le mauga i Roma. Na tanuina o ia i se nofoaga e lata ifo i ai ma na fausia ai luga se falesa e fa’amanatu ai o ia.

O le Epikopo a Terni

O le tala e uiga i le Epikopo a Terni na tupu pe tusa ma le fitusefulu tausaga mulimuli mai ai: Na valaulia Valentine i Roma e le failauga ma le atamai o Crato, o se fa’a’oga i gagana Eleni ma le Latina. Sa i ai lona atali’i e igoa ia Chaeremon o lē sa puapuagā i le fa’aletonu o lona tino sa fa’amalosiā ai o ia e tu’u lona ulu i le va o ona tulivae. E le’i i ai se foma’i na mafai ona fa’aleleia lea ma’i. Ae na folafola atu e Crato le afa o ana oloa ia Valentine pe afai na te fa’amaloloina lona atali’i. Ae i se

talanoaga umi i le po, na fa’amatala e Valentine e lē o ana oloa e leai se aogā e fa’amaloloina ai le tama, ae o le fa’atuatua i le Atua e tasi. Ona tatalo ai lea o Valentine i luga o le tama ma na toe fa’afo’i mai lona soifua maloloina lelei. I le ofo ai i lea vavega, na papatisoina ai Crato ma lona auaiga atoa e le epikopo, fa’atasi ai ni ali’i a’oga e to’atolu mai Eleni, o Proculus, Ephebus ma Apollonius Abbondius, le isi tama a’oga ma le atali’i a le Ta’ita’i a Roma, o Furious Placidus, na fa’amaoniaina maia le Fa’akerisiano. Ua tatou iloaina na umia e Placidus le tofi ta’ita’i mai le 346 – 347AD, o le aso lea fa’atala’aga ua tatou tu’u fa’atasia ma le maletile o Valentine. Na mafatia tele Placidus ina ua liliu lona atali’i. Sa ia fa’atonuina le saisaia o Valentine ma na ave’eseina lona ulu i luga o le mauga Via Flaminia i Roma. O lenei fa’asalaga na fa’atinoina i le po ina ia aua ne’i i ai ni fa’afitauli e tutupu mai le anoanoa’i o Kerisiano i le ‘a’ai. I se taimi pu’upu’u talu ona uma le tanuina i le nofoaga na maliu maletile ai, o Proculus, Ephebus ma Apollonius na ave le tino a le maletile i Terni ma tanu ai i fafo mai o le ‘a’ai. Ae i Terni, na saisaia e le Konesula o Lucentius le to’atolu o latou ia ma ae le’i fa’asa’olotoina i latou e tagata, na fasala oti i le sala’eseina o latou ulu. Ina ua iloa e tagata lenei fa’asalaga oti, na latou tanu ia i latou nei fa’atasi ma maletile fou ma Valentine i lona tu’ugamau.

O Sagato e sulufa’i i ai tagata fai pa’aga

E tele feso’ota’iga i le va o tala ale Valentine a Roma ma le Valentine a Terni, ua a’afia ai ma nofoaga na maliliu ma tanu ai, ae mo tatou e lē manatu o le tagata lava e to’atasi. Ua la’ua aumaia ni molimau o le maoa’e o le fa’atuatua, na la’ua faia ni fa’amalologa fa’avavega na mafua ai ni liliuga, ma na maliliu maletile ile tipieseina o la ulu i le mauga o Via Flaminia i Roma. O le Ituaiga o le au Penetito na tausia le falesa a Sagato Valentine i Terni i le vai-taimi o Tausaga Ogototonu ma fa’alauiloaina le fa’amamaluina fa’alelotu o le Aso Valentine ia latou monasari i Farani ma Enelagi. Ole tu masani o le avea o ia e fai ma sulufaga a le au fai pa’aga o lo’o maua lona amataga i se tusitusiga fa’a – Peretania na tusia e le ali’i e igoa ia Geoffrey Chaucer, o lē na aumaia le mau o manu felele na amata a latou feusua’iga i le Aso Valentine. I le ogagatotonu o Fepuari, ma o le mea mautinoa, na amata ona feala mai le natura mai faigamalologa ma le lelavā o le tau malulū, o le mafuaga lea ua avea ai Sagato Valentine ma sagato e fa’ailoaina le sau o le tau tuputupua’e – o le mea lea o isi o taimi o ia ua fa’ailoa mai o lo’o u’uina le la i ona lima.

MO TUPULAGA TALAVOU MA LE NUU ATOA UMA O LE ATUA

(fa'aauau mai lomiga talu ai)

^{26.} I le va o nei tala e lua, ua tatou maua ai le isi, ua fa'aalia mai ai Iesu o se talavou, ina ua toe fo'i mai ma ona matua i Nasareta, i le toe maua mai i lona leiloa ma le toe mauaina i le Malumalu (cf. Luka 2: 41 – 51). O i'ina ua tatou faitau ai “ua 'ana'ana o ia ia te i la'ua” (cf. Luka 2: 51); e le'i tia'ia e ia lona aiga. Ona toe fa'aopoopo lea e Luka fa'apea “ua tupu le poto ma le tino o Iesu, ua alofagia o ia e le Atua atoa ma tagata” (cf. Luka 2: 52). I se isi fa'aupuga, o le taimi lenei mo tapenaga, ina ua amata ona tuputupu a'e le mafutaga a Iesu ma lona Tamā ma isi. Na fa'amatala e Sagato loane Paulo II e lē gata na tuputupu a'e i le fa'aletino, ae “sa iai fo'i ma le tuputupu a'e fa'aleagaga ia Iesu”, ona o le “atoaga o le kalasia ia Iesu sa feagai lea ma ona tausaga: sa i ai pea le atoaga, ae o le atoaga na tuputupu a'e a o fa'asolosolo ona matua o ia.”

^{27.} E pei ona ta'u maia e le Evagelia ia i tatou, e mafai ona tatou fa'apea a'e o Iesu, i tausaga o lona talavou, sa “a'oa'o'ina”, sauniuni e fa'atino fuafuaga a le Tamā. O lona matua ma lona talavou na fa'atualagaina o ia i le auala aga'i atu i lenā tala'iga mamalu.

^{28.} I lona matua ma le talavou, o le va feagai a Iesu ma le Tamā o se Alo alofagia. Tata'i atu i le Tamā, na tuputupu a'e ma le popole i ana mea e fai: “Lua te iloa 'ea e tatau ona ou i le fale o lo'u Tamā?” (Luka 2: 49). Ae ao pea ona manatua o Iesu e le'i manatu o se talavou e manatu ia lava. O ana mafutaga sa faia o ia o se talavou sa fa'asoa

atoa i olaga a lona aiga ma ona tagata. Sa ia a'oa'o'ina le galuega a lona tamā ma na suia o ia o se kamuta. I se tasi o taimi i le Evagelia sa vala'uina o ia “le atali'i a le tufuga” (Mataio 13: 55) ma o le isi taimi ua na o “le tufuga lenei” (Maleko 6: 3). O fa'amatalaga ua fa'ailoa mai ai o ia o se tasi o ali'i talavou mai lona 'a'ai, e masani i le to'atele. E le'i va'aia se isi e 'ese mai isi. Mo lena mafua'aga ina ua amata ona tala'i Iesu, e lē manatuaina e tagata po ofea na maua mai ai lona atamai: “E lē o le atali'i ea lenei a Iosefa?” (Luka 4: 22).

^{29.} O le mea moni e le'i tuputupu a'e Iesu i se mafutaga fa'alavelave ma Maria ma Iosefa, ae na feagai lelei ma le aiga potopoto, o aiga a ona matua ma latou fa'auō. O le mea lea ua tatou malamalama ai pe aiseā, ina ua toe fo'i mai i lana malagasā i Ierusalemā, o ona matua na manatua o se tamaitiiti e sefululua tausaga (cf. Lk. 2: 42), o lo'o fealualua'i solo ma le anoanoa'i o tagata, e ui latou te le'i va'aia o ia i le aso atoa: “Fa te i laua o i le au malaga o ia; ua la po tasi i le ala, ona la saili lea ia te ia i lo la aiga ma ē na latou masani” (Luka 2: 44). Na latou manatu lava sa i ai i'ina Iesu, fa'atasi ma isi, tausua'i ma isi talavou, fa'alologologo i tala a le au matutua ma fa'asoa i fiafiaga ma fa'anoanoaga a le kulupu. Ioe, o le upu Eleni na fa'aogaina e Luka e fa'amatala ai le kulupu – synodia – manino lelei le fa'amatalaga o se “fa'apotopotoga tele o lo'o faimalaga” sa 'au atu i ai le Aiga Pa'ia. Fa'afetai le fa'atuatuga a ona matua, na mafai ai e Iesu ona

fealua'i sa'oloto ma a'oa'o ai le faimalaga fa'atasi ma isi.

O LONA TAIMI TALAVOU UA A'OA'O'INA AI I TATOU

^{30.} O vaega nei o le soifuaga a Iesu ua fa'amaonia e mafai ona fa'aosofiaina mo talavou uma o lo'o sauniuni ma fuafua e fa'atino la latou misiona o le olaga nei. E a'afia ai le tuputupu a'e o le mafutaga ma le Tamā, i le iloaina o le a avea ma se vaega o le aiga ma ni tagata, ma i le tatala atu ina ia fa'atumulia e le Agaga Pa'ia ma ta'ita'iina e tauave le misiona na tu'uina atu e le Atua ia i latou, o a latou tofiga. E le tatau ona lē amana'iaina lenei i galuega fa'alafu lemū ma tupulaga talavou, ina ne'i o tatou fausia ni polokeki e vavae'ese mai ai tupulaga mai o latou aiga ma a latou fa'apotopotoga, pe faia i latou o ni tagata fa'apitoa, puipui mai i le fa'aleagaina. Ae sili ai, tatou te mana'omiaina ni polokeki e fa'amalosi 'au ia i latou, savavali fa'atasi ma i latou ma fa'amalosi'au ia i latou e feiloa'i atu i isi, ina ia 'au ai i 'au'aunaga alofa, a le tala'iga.

^{31.} E le a'oa'o outou e Iesu, le au talavou, mai se mamao pe e aunoa, ae mai totonu o lou talavou, o se talavou ua ia fa'asoa ma 'oe. E ta'ua tele mo 'oe le tomanatu i le Iesu talavou e pei ona aumai e Evagelia, ona o ia o se tasi ma outou, ma fa'asoa le tele o vaega o lou agaga talavou. Ua tatou va'aia lenei mo se fa'ata'ita'iga i vaega nei: E i ai le fa'atuatuga lē fa'atuā'oa a Iesu i le Tamā; sa fa'atumauina lana fa'auō ma ona so'o, ma e o'o lava i taimi o faigatā sa tumau lava lona

APOAPOA'IGA FAA-APOSETOLO A LE TAMA PAIA POPE FALANISISI I LE MAE'A O LE SINOTI CHRISTUS VIVIT – O LOO SOIFUA KERISO

fa'atuatuaga iā i latou. Sa fa'aalia lona alofa loloto mo le au vaivai, ae maise le au matitiva, le au mama'i, agasala ma latou ua lē amana'iaina. Sa i ai le loto tele e feagai atu ai i le au ta'ita'i fa'alelotu ma le malō o ona taimi; sa iloina le lagona o le lē malamalamaina ma le te'ea; sa maua fo'i i le mata'u ma sa iloina le vaivai a le Pasio. Sa liliu atu lana pupula i le lumana'i, tu'u atu o ia ma le fa'atuatuaga i lima saogalemū a le Tamā i le malosi a le Agaga. Iā Iesu, o le a mafai e talavou uma ona va'aia iā i latou lava.

³² I se isi va'aiga, ua toetū a'e Iesu, ma ua mana'o iā tatou e fa'asoa i le olaga fou o le toetū. O ia o se talavou moni a se lalolagi ua matua, o se talavou a le atulaulau o lo'o fa'atalitali i le 'ōi ma le 'o'ono' (Roma 8: 22) ina ia fa'aofuina i lona malamalama ma ola ai i lona olaga.

Fa'atasi ma ia i o tatou autafa, ua mafai ona tatou feinu mai le puna vai moni ua fa'aolaolaina a tatou miti, a tatou galuega fai, a tatou manatu tetele, a o fa'amalosia i tatou e folafola le mea moni e tatau mo lenei olaga. E lua ni vaega masalomia i le Evagelia a Maleko ua fa'aalia mai ai pe fa'apefea na toe tutū fa'atasi ma Keriso ona fa'amatalaina o ni talavou moni. I puapuaga o le Ali'i ua tatou va'aia ai se ali'i talavou na mana'o e mulimuli atu ia Iesu, ae i le fefe na sola 'ese ai ua lē lavalava (cf. 14: 51 – 52); sa leai se loto tele e tu'u uma atu ai mea i le mulimuli i le Ali'i. Ae i le tu'ugamau ua leai se isi, ua tatou va'aia se isi tagata talavou, "ua ofu o ia i le ofu pa'epa'e tatau-puvae" (16: 5), ua fautua atu i fafine e 'aia le matata'u ma folafola atu le olioli o le toetū (cf. 16: 6 – 7).

³³ O lo'o vala'au mai le Ali'i iā i tatou e fa'asusulu fetū o le pō a isi tagata talavou. Ua talosagaina oe e va'ai i fetū moni, o fa'aailoga uma na ua ia aumaia iā i tatou e tapasaina o tatou ala, ma fa'ata'ita'i le faifa'atoaga na va'ava'ai i fetū ae le'i amataina ona suaina lana fa'atoaga. Ua fa'asusulu e le Atua fetū e fesoasaoni iā tatou savaliga: "A o fetū ua latou fepulafi iā latou leoleoga, ma ua latou olioli; ua vala'auina i latou ma ua latou fai mai, "O i matou nei!" (Paruka 3: 34 – 35). O Keriso fo'i ia o la tatou malamalama sili o le fa'amoemoe ma la tatou ta'iala i le pō, ona o ia o le "fetū ao pupula" (Fa'aaliga 22: 16)...fa'auaau pea..

O LE AIGA MONI A IESU

Ua o atu i latou i le fale; ona toe potopoto mai lea o le motu o tagata, ua le mafai ai e i latou ona 'a'ai. Ua fa'alogi ai lona aiga, ona latou o atu ai lea e pu'e iā te ia; auā na latou fa'apea ane, "Ua valea o ia."

A o le au tusi upu ē na o ifo mai Ierusema, ua fa'apea ane i latou, "O iā te ia Pelesepu, o le ali'i fo'i o temoni, e tuli ai e ia o temoni." Ua vala'au atu ia iā te i latou, ona fetalai atu lea iā te i latou i fa'ata'oto, "E mafai fa'apefea e Satani ona tulia o Satani? Afai fo'i e fevaevae'i se malō, e lē mafai ona tumau o lenā malō; ma afai fo'i e tete'e atu Satani iā te ia lava, ma fevaevae'i o ia, ona lē mafai ai lea ona tumau o ia, ae o'o i lona i'uga. I le isi itu, e leai se na te mafaia ona ulu atu i le fale o le tagata malosi, ma vete ana mea, seia lua'i noanoatia le tagata malosi, i le vete ai lona fale.

E moni ou te fai atu iā te outou, E fa'amagaloina agasala uma a tagata, atoa ma upu faifai uma latou te faifai ai; a o lē faifai i le Agaga Pa'ia, e lē fa'amagaloina o ia,

e le tu lava; ae peita'i e nofo sala o ia i le agasala fa'avavau": auā na latou fai mai, "O ia te ia le agaga leaga".

Ona o mai ai lea o lona tinā ma ona uso, ua tutū i fafo, ma fe'au atu iā te ia, ma vala'au atu iā te ia. Ua nonofo vagavagai iā te ia le motu o tagata, ua latou fai ane fo'i iā te ia, "Fa'auta, o lou tinā ma ou uso o i fafō o sa'ili iā te oe. Ona tali atu lea o ia, "O ai ea lo'u tinā? O ai fo'i o'u uso?" Ona silasila solo ai lea o ia i e nonofo vagavagai iā te ia, ua fa'apea atu, "Fa'auta i lo'u tinā ma o'u uso! Auā o lē faia le finagalo o le Atua o lo'u uso lea, ma lo'u tuafafine, ma lo'u tinā" (Mareko 3: 20 – 35).

Atonu e fa'ate'ia nisi o latou e iai le tu'utoina ia Maria, ae o se manatu sesē i le fa'apea ane o Maria, le tinā o Iesu o se tasi o latou sa fa'apea mai, 'Ua fa'aletonu lona mafaufau'. Na mautinoa lava e le'i mana'o e taofiofi iā Iesu. Ae o le mea moni lava, o puapuaga a

O LE PSE A LE AUAUNA—O LE AIGA MONI A IESU

Maria e masalomia sa tetele, i le va'ai atu i le leai o se fa'atuatua ma se fa'aaloalo i lona Alo o se suli o lona lava aiga. E foliga mai sa tigā tele o ia iā latou gaoiga. Atonu sa i ai o ia ina ia fa'afilemū ai i latou ma aumaia i latou i ni mafauauga lelei.

O upu a Iesu, i se isi itū, o se alu 'ese mai i lona aiga fa'anatura, ma e o'o lava mai lona tinā fa'aletino. O ni fa'aaliga o le tu'ua'iga lava e tasi po o le alu'ese atu ua tatou va'aia i fa'amatalaga e uiga ia Iesu i le malumalu. "Se a 'ea le mea na oulua sa'ili mai ai iā te a'u? Lua te lē iloa 'ea e tatau ona ou i le fale o lo'u Tamā?" (Luka 2: 49). O lenei ua manino lelei mai ai o Iesu e le'i sau e atia'e lona aiga itiiti, ae ina ia avatu le fa'aolaola i le aiga o so'o i le lalolagi atoa, o se aiga ua fa'avae atoa i le tulaga o le Atua mamana, lona Tamā i lona tulaga fa'atamā aoao fa'apea lona ia tagata o se Uso mo tagata uma. I lenei va'aiga, ua tatou malamalama ai i le tulaga mai o tatou lava aiga, aemaise pe a latou taumafai e fa'alavelave i la tatou taumauga atoatoa ile malō o le Atua. Aua ne'i o tatou fa'agaloina fo'i o le tu'ua'iga ua na o se tasi o vaega. O se vaega o le fa'aaliga matagofie o le tala lelei o latou e mulimulita'i iā Keriso ma le loto atoatoa, po o le a lava lona tau, e pele iā te ia o ni uso ma tuafafine. E le gata i lea, e pele iā ia e pei o lona tinā. O lenei fa'aaliga o le alofa a lo tatou Ali'i mo tatou ua ta'ita'ia i tatou i se malamalama'aga lelei i se fa'aaliga fa'apea ma e sili atu lona loloto: "Fa'apei ona alofa mai o le Tamā ia te a'u, e fa'apea lava ona ou alofa atu iā te outou' (Ioane 15: 9).

O Maria, fa'apa'iaina atoatoa i le malō o le Tamā ma le tala'iga a le Auauna a le Atua, e le'i avea ma se fa'alavelave i le tala'iga a Keriso. I le fa'afeagai ai, o lona olaga atoa na fesoasani iā i tatou e malamalama i le uiga o le tu'ua'iga, malaga 'ese atu, a o ia mulimuli atu ia Keriso i ona taimi ta'ua tele, aemaise i tulaga o le fa'amāiasiasi, ma e sili atu a o tu i lalo ifo o le Koluse. Afai ua tatou sauni e mulimuli atu ia Maria i lenei auala, ona atonu i taimi o puapuagatia tele o le a tatou malamalama lelei atoatoa ai i le uiga o le pele iā Iesu e pei o lona tinā; o le a tatou fa'alogu ma malamalama i le upu: 'Fa'auta, o lou tinā'.

O lenei ua mafai ai ona tatou malamalama i lenei tali a Iesu iā i latou sa le'i iloina lava o ia o le ma'a tulimanu a se aiga aoao fou e lē o fa'a'esea i tatou mai ia Maria, ae fesoasani iā i tatou ina ia malamalamaina lana matafaioi i le aiga fou a le Atua. Ma ua tatou iloina o le a i ai pea o ia ma i tatou i taimi o fa'asoosoga tele i o tatou olaga pe afai ua tatou sauni e mulimuli atu i le 'Au'auna a le Atua.

Matou te vivi'i atu iā te oe, Tamā o lo matou Ali'i i lou Alo pele ua e aumai ai iā i matou le

Avanoa e au ai i lou aiga ma vala'au oe, fa'atasi ma Iesu, Tamā. Matou te fa'afetai atu iā te oe,

Iesu, mo lou alofa e le gata, e mutimutivale e pei o le alofa a se tinā ma e sili atu

lona mutimutivale i lo le tinā silisili, lou tinā. A matou fa'atasi ma oe i le alofa mo lou tinā

ma iloina ai lou alofa fa'apelepele iā te ia, e mafai ona matou fa'alatalata atu iā te oe

ma malamalama loloto i le tele o lou alofa iā i matou, e pei o Maria, matou te fa'alogu

ma le toto'a i lau upu, teuina i o matou loto ma fa'aogā. Le Ali'i e, aumai iā i matou

Le mafai e avea ma tagata e fa'alogu moni i lau upu,

ma mafai ona tali atu ma o matou loto i o matou olaga atoa. Maria e, i taimi o tigā na

mafua ona o nisi o lou aiga, sa e olioli, Fa'alogoina o lou Alo e alofa iā i matou uma, lau fanau,

i le alofa e pei ona ia alofa ia oe. I le iloina o lenei, ua matou iloina fo'i le tele o lou alofa mo matou

ina ua matou tu'uina atu o matou fa'atuatua iā Iesu. Tatalo mo matou, Maria e,

ina ia matou fa'afetaia lenei avanoa, ma ia leai se mea e taofiaofia ai i matou mai le mulimuli

iā Keriso ma le loto atoa o ni suli a se aiga fou e fa'aaloalo i le Tamā e tasi i le lagi, ma avatu le fa'aaloaloga ia te oe le tinā o le ola. Amene

GALUEGA A LE AU APOSETOLO

(FA'AUAU MAI LOMIGA TALU AI)

16: 11 – 15 O le liliuina o Litia ma lona aiga

I le sa'ilia o se fale tatalo lutaia, o Paulo, Sila, Timoteo (ma Luka pe a tatou malamalama ile "matou" fa'atala fa'asolopito) na feiloa'i atu i se kulupu o fafine na potopoto i autafa o le vai tafe. I le fa'aogaina lelei o upu, na fa'amatala e Luka le tasi Litia. O se fafine fai pisinisi, e fa'atau atu la'e lanu violē taugatā, e mata'u i le Atua, ma e tele ana 'oa ua avea ai o ia ma tama'ita'i o le aiga. O lona tatala atu o ia lava ma le tali atu i fa'asoa a Paulo o le upu na fa'amatalaina e Luka i se gagana e talitutusa ma le liliuga o le to'alua mai Emau i le Luka 24: 31 – 32: "Ua tatala e le Ali'i lona loto." (loto o le fafine). O liliuga ma papatisoga na ta'ita'ia sa'o lava i le tali malō lelei. Mulimuli ane na toe fo'i le au misionare i le "fale a Litia" (v.40) ina ua tatala mai le fale puipui, ma atonu o Litia na va'aia o se ta'ita'i o le ulua'i falesa i Filipi (ma o le ulua'i i le mea na mulimuli iloina o Europa).

16: 16 – 40 O nisi mea na tutupu i Filipi: momoli maia, falepuipuiina, ma isi momoli maia.

I lona aga'i atu i le fale tatalo, na feiloa'i atu Paulo i ni fa'asalalaua e le'i talosagaina ma le fa'atigā ulu. O se auuauna teine ua i ai le aitu vavalo ua fealua'i ma taulaga le mea moni: "O 'au'auna nei tagata a le Atua silisili 'ese, latou te tala'i atu ia te outou le ala o le fa'aolataga" (v.17). E ui e moni i le va'aiga i le tulaga Kerisiano, o le gagana e lē manino o le a lagonaina e le au fa'apaupau ua fa'aioaina o Paulo ma Sila ua fa'alauiloaina se fofō fou i le igoa o le atua ua la fa'aioaina o se atua sili a le au fa'apotopotoga fa'apaupau. Ina ua taofia e Paulo lenei

faiga i se poloa'iga i le suafa o Iesu ma le fafine na fa'amaloloina ua ulufia e le agaga, o tagata sa fa'aogaina o ia, ua fa'anoanoa ile a'afiaga o a latou pisinisi, ua aumai le au misionare i luma o le au fa'amasino Roma. O le moliaga: Tala'iga (tete'e i le pulega a le tupu) e lē fa'atulafonoia.

O le to'afa ua fa'atelenoa, sasa, ma fa'afalepuipui. A o malōlō i le po o se mafui'e na matala uma ai faitoto'a o le falepuipui fa'apea filifili sa noanoatia ai pagotā. Ina ua taunu'u leoleo o le falepuipui na latou va'aia le au misionare ua fa'asa'olotina ae o lo'o nonofo ai pea i le fale puipui, ma na tali atu i lenei fa'aailoga ua va'aia i le pa'ū ifo i ona tuli ma talosaga atu, "Ali'i e, se a le mea e tatau ona ou faia ina ia fa'aolaina ai o a'u?" Ua fai atu i la'ua, "Inā fa'atuatua ia i le Ali'i o Iesu Keriso, e fa'aolaina ai oe atoa ma lou aiga." E pei o Litia, o le tatala atu na ta'ita'ia i le liliuina o se aiga atoa, tali malō lelei, ma le papatisoia.

Ina ua malamalama a'e ta'ita'i Roma i lo latou sesē ma taumafai loa e fa'atu'umuli Paulo ma uō ma le filemū, na fa'asagatau atu Paulo i leoleo. O ia ma uō o sitiseni Roma, ma na finau atu i le sasaina ma le fa'afalepuipuiina o latou e aunoa ma ni fa'amasinoga o le lei o se fai meatonu lea e ao ona toe liliu e lē fa'aliloliloia ae ia aloa'ia. O le mafua'aga lea na fa'ato'ese ai ma le māasiasi le au fa'amasino na o mai e fa'ato'ese ma talosagaina i latou e tu'ua le taulaga. Ona latou faia lea fa'apea, ae na afea le fale a Litia e fa'amalosi'au i le fa'apotopotoga Filipi. ..fa'auaua pea...



FAITAUGA MO LE MASINA O FEPUARI 2023

ASO 19 FEPUARI—ASO SĀ 7 TAUSAGA MASANI

Faitauga 1: Levitiko 19: 1 – 2, 17 – 18: **Matua:** E te alofa atu i lē lua te tua'oi ia pei o 'oe lava iā te oe.
Salamo: 103 :1 – 2 (tali), 3 - 4 (tali), 8, 10 (tali), 12, 23 (tali): **Tali:** E alofa mutimuti vale ma alofa lua mai le Ali'i.
Faitauga 2: 1 Korinito 3: 16 - 23 **Matua:** O mea uma lava e a outou ia; e o Keriso fo'i outou e o le Atua fo'i Keriso.
Aleluia, Aleluia—O au afioga o le agaga ia, o le ola foi ia; o ia te oe le upu o le ola fa'avavau lava. Aleluia.
Evangelia: Mataio 5: 38 – 48: **Matua:** la outou alolofa atu i ē ua ita mai iā te outou.

Tofitofiga O le Upu: I le gagana Eperu o le upu "talion" o lona uiga o le Tulafono o le tau ma sui. I le Feagaiga Tuai ma taimi anamua o lenei Tulafono na puipuia tagata i le noatia o le isi tupulaga fai mai e tauia se manu'aga po o se fasiotia o se tasi o le aiga. O tusi muamua e lima a le Tusi Pa'ia ua tu'uina atu se tapula'a i lenei "talion" po o le Tulafono o le tau ma sui. O nei Tulafono ua taumafai e fa'amautinoa o le manu'aga na faia e lē ua tau ma sui i lo le leaga na faia e lē na mua'i faia le leaga.

Ina ua sau Keriso i le lalolagi, o le agaga ma le lagona lea a tagata luitaia – tau ma le ita ua sosolo mālie ifo iā i latou. O le agamalū na fa'aalia e Keriso ma le a'oa'oga o le alofa sa ia tala'i atu o se mea e 'ese toe fou i le fa'alogo. Na fa'aoga e Keriso mo latou sa fa'alogo fuaiupu mai le Esoto ma le Levitiko ua fa'apea mai, "O le mata mo le mata, ma le nifo mo le nifo." A o lenei, o lē ua tautala o le Mesia ma le Alo o le Atua, ua fete'ena'ia ma suia lenei poloa'iga. Ua ia fai mai, "Aua ne'i outou tete'e atu i le leaga." Ua ia tu'uina atu se tulafono fou mo le Feagaiga Fou.

Ona faitau auaua'i mai lea e Keriso o vaega e fa e lē mafai ona te'ea. O le ulua'i o nei mea o le fa'atupu fa'alavelave. Ua fai mai o ia, "O lē po iā te oe i le tasi alafau, ina liliu atu i ai le tasi;" O le vaega lona lua o se faiga fa'aletulafono; ua fai mai o ia, "o lē ave 'ese lou ofu tele, aua e te vaioa atu fo'i lou ofu tino." O le vaega lona tolu o galuega fa'apologa po'o 'au'aunaga. O faigamalō anamua sa i ai le malosi fa'aletulafono e fa'amalosia ai o latou tagata e faia ni galuega; mo se fa'ata'ita'iga, o Simona le Kurene na fa'atonuina e fesoasoani e amoina le koluse a Keriso i Kalevalio. O se fa'apuga ua tutusa ma lenei o le "ia savalia se maila." O le mea lea na fa'apea mai ai Keriso, "Ai se na te tauanau mai lua te o ma ia i le maila e tasi, inā o ia oulua ma ia i maila e lua."

O le vaega lona fa o le leai o se te'ena o le avatu ma foa'i atu tupe. Na fa'atonuina e Keriso latou sa mulimuli atu iā te ia e foa'i atu i tagata 'aia ma latou ua aitalafu.

I le fa'atulagaina o vaega nei e leai se te'ea, e lē o tineia pe o fete'ena'i le vituti o le faimeatonu e mafai ona foa'i e se tasi ana meatotino, taimi po'o galuega. O le mea o lo'o fai mai ai Keriso o mea ua mana'omia e le Tulafono e lē tatau ona fuaina ai o tatou lima foa'i. E ao ona tatou foa'i fa'asili atu. O lo'o fai mai o ia e i ai le isi Tulafono i luga atu o le Tulafono o le faimeatonu – o le Tulafono o le alofa. E ala i le alofa tatou te lē fuaina mea ua tatou foa'i atu; tatou te foa'i ma le alofa e aunoa ma le fuaina.

Na toe ta'ua e Keriso le tusi o Levitiko, "Ia e alofa atu i lē lua te tua'oi ia ia 'ino'ino i lē ua ita mai iā te oe." O Keriso i lana pule mamana na suia lenei poloa'iga i le:" ia outou alolofa atu i ē ua ita mai iā te outou, ia outou tatalo fo'i mo e ua fa'asauā mai iā te outou." I le Feagaiga Tuai o le au luitaia o ni tagata e loto nu'u. O la latou talitonuga ua na o le latou atunu'u; sa fa'asaina e le Tulafono ona fa'aipoipo atu i tagata mai isi atunu'u po o tagata mai nu'u 'ese. O le inoino po o le fa'amanu'aina o isi tagata e lē o se sesē lea i le Tulafono. Ua fa'ate'ia e Keriso la latou tu masani. Ua mafua iā ia se fa'anoanoaga ma le fa'aletonu i tulaga o mea sa ola mai ai i augatupulaga e tele. O le olaga ma le aganu'u fa'a-luitaia sa fa'a'auto i la latou lava atunu'u; a o lenei ua susu'e e Keriso le veli puipuia sa ufiufi ai. Sa ia fa'ailoa atu iā i latou o tagata o lo'o ola ai i tua atu o latou tuā'oi fa'aleatonu'u o a latou tuā'oi fo'i ia. O lo'o ia ta'u atu i tagata luitaia e i ai le noataga iā i latou e alolofa atu ai i nei tagata.

11

ASO 26 FEPUARI—ASO SĀ MUAMUA FAGAFULU

Faitauga 1: Kenese 2: 7 – 9; 3: 1 – 7: **Matua:** O le ulua'i tagata. O le agasala muamua.
Salamo: 51: 1 – 2 (tali), 3 – 4 (tali), 10 – 11 (tali), 12, 15 (tali): **Tali:** Le Ali'i e, alofa mai, auā ua matou agasala.
Faitauga 2: Roma 5: 12 – 19: **Matua:** Ua silisili lava le alofa tunoa, ina o fa'ateleina le agasala.
FUAIUPU MO LE EVAGELIA: E le na o mea e 'ai e ola ai le tagata, a o afioga uma e tulei mai i le fofoga o le Atua.
Evangelia: Mataio 4: 1 – 11: **Matua:** Na fa'alaina Iesu i po e fagafulu ma ao e fagafulu.

Tofitofiga O le Upu: Ua amata le Fagafulu i se mea na tupu ua tatou masani ai o le ta'ita'ia o Iesu mai le toafa e le Agaga ina ia tofotofoina. I le Tusi Pa'ia Eperu o le toafa o le nofoaga o tauiviga: ua tofotofoina le Atua e le tagata, le tagata e le Atua. O le tofotofoina o Iesu ua alu tutusa ma mea o lo'o fa'amatalaina i le tusi a Esoto. O le fa'atuatua a Mose i le Atua ua tofotofoina muamua i le fia 'ai; ona soso'o ai lea ma le lē masani i fa'ai'uga a le Atua i le tulaga o le manai. O le fa'atuatua a Mose iā ia lava ua tofotofoina i le tomumu ma le tete'e a ana pa'aga ma lona mata'u ina ne'i lē va'aia o ia e lē talafeagai ma le tofiga ta'ita'i. O lona fa'atuatua i le Atua ua maluelue ma mo se taimi i le vai a

Morepa.

O le fa'amatalaga a le Esoto o lo'o maua ai le ta'ua so'o mai o le leai o se fa'atuatua, i le alofa fa'amaoni a le Atua ua tofotofoina e le fa'ataunau so'o a le tagata mo se fa'amaoni a'ia'i ma la latou galogalo gofie o mea malolosi na tutupu mai lea taimi i lea taimi. O la latou galala mo ni vavega e lē uma. O le ta'iseseina i le ifo i tupua ina ua foliga mai ua fa'aletonu la latou ta'ita'i, o la latou Atua ua atagia mai e fa'atauva'a.

Ae afai o le toafa o se nofoaga o tofotofoina, e fa'apena fo'i o se nofoaga o le va mafana, le nofoaga, o Mose o se ali'i pito sili le agamualalo i le



FAITAUGA MO ASO SA MUAMUA O MATI 2023

lalolagi, na feagai atu i le Atua ma talanoa ma le Atua o se uōfoaga e pei ona fai mai Osea, na toe māunu mai ai e le Atua Isaraelu i se feagaiga alofa fa'afouina, ma o le nofoaga e ui i le faigatā ma le loto ma'a'a, ae na tu'uina atu lava e Isaraelu i latou ina ia ta'ita'ia i le fa'atuatua, i le aga'i atu ma le fa'aeteete. Afai e feagai atu lesu ma ni tofotofoga i le toafa o i'ina fo'i ma isi nofoaga e leai ni pisa, sa ia feiloa'i atu ai i le Atua i se fa'atasiga loloto ma le mafana. I le Fagafulu ua ia vala'auina i tatou e fa'atasi ma ia i se nofoaga e leai se vevesi ma se pisa. O i le toafa ua ia ta'ita'iina i ai tatou e toe fa'amanatu mai ai iā tatou lona alofa ma lona mana ua lavea'ia ma fa'amagalo ai i tatou.

ASO SA 2 FAGAFULU—ASO 5 MATI

Faitauga 1: Kenese 12: 1 – 4

Matua: Ua vala'auina Apera'amo o le tupuga ia o le nu'u o le Atua.

Salamo: 33: 4 – 5 (tali), 18 – 19 (tali), 20, 22 (tali)

Tali: Le Ali'i e, ia i luga ia te i matou lou alofa, e pei ona matou fa'amoemoe iā te oe.

Faitauga 2: 2 Timoteo 1: 8 – 10

Matua: O lē na fa'aola mai iā te i tatou, ma vala'au mai i le vala'au pa'ia.

FUAIUPU MO LE EVAGELIA: O le si'ufofoga o le Tamā mai le ao ua fa'apea mai, o lo'u Atali'i pele lenā, ia outou fa'alogo iā te ia.

Evagelia: Mataio 17: 1 – 9

Matua: "Ua pupula mai ona fofoga e pei o le la".

12

FA'ASOLOGA O MISASA SAMOA MO FEPUARI 2023


Aso Sa 3 Aso 19 Fepuari 2023


02:00 pm	Misasa Amata ole Tausaga 2023	Cardinal John Dew <i>Concelebrants:</i>
----------	-------------------------------	---


Aso Sa 4 Aso 26 Fepuari 2023


11:00 am	Te Wairua Tapu? Wainuiomata (Petone)	Patele Maleko
11:00 am	Stokes Valley	Patele Andrew/Peter

Mikaele Teofilo:

 m.teofilo@wn.catholic.org.nz

 +64 4 496 1707

 021 0818 5037

 PO Box 1937, Wellington 6140, New Zealand